

尚書證義

尚書證義

平湖周用錫述

立政

周公若曰。拜手稽首。告嗣天子王矣。用咸戒于王。曰。王左右。常伯常任。準人。綴衣。虎賁。周公曰。嗚呼。休茲。知恤鮮哉。

咸卦彖傳咸感也。感動嗣王也。常伯常任準人之名。不見于周禮。王制孔傳以常伯爲三公。常任爲六卿。準人爲士官。竝無所據。正義亦不能證。詳讀經文。周公先言王左右。而後舉此三官。又與綴衣虎賁竝列。則是左右親近之臣。位不甚尊。而所繫實重。故舉以爲戒也。漢書谷永對策云。習善在左右。誠敕正左右。齊栗之臣。戴金貂之飾。執常伯之職。師古注。常伯侍中也。一曰

常任使之人此為長也後漢書楊賜傳樂松處
常伯松時為侍中也文選藉田賦注引應劭漢
官儀云侍中周成王常伯任侍中殿下稱制劉
琨詩注引揚雄侍中箴云光光常伯古文苑胡
廣侍中箴云亦惟先正克慎左右常伯古文苑
為政首是常伯常任即漢之侍中說文引作常
皎常任古今文異也漢書律歷志準者所以揆
平取正也史記武帝置平準官籠天下鹽鐵是
準人即漢之平準以周禮考之常伯即宮伯常
任即宮正準人即大府也顧命狄設綴衣正義
云綴衣是黼展之類以周禮考之即幕人也皆
隸于天官周禮虎賁氏掌先後王而趨以卒伍
隸夏官宮伯掌王宮之士庶子宮正掌王宮之
戒令糾禁大府掌關市之賦以待王之膳服幕
人侍帷幄虎賁司宿衛皆左右親近者也此蓋
文武時之官其名多與周禮異者周公制一代
之禮有仍其舊官名者有仍其職而改其官名
者且有所增有所省或因革故不同也釋詁
休美也恤憂也周公復歎息言此左右五官固
多休美然知憂勤者少哉

古之人迪惟有夏乃有室大競顓俊尊上帝迪知
忱恂于九德之行乃敢告教厥后曰拜手稽首后
矣曰宅乃事宅乃牧宅乃準茲惟后矣謀面用丕
訓德則乃宅人茲乃三宅無義民。

釋詁迪道也釋言競彊也說文顓呼也忱誠也
方言恂信也宋衛汝穎之閒曰恂九德之行皐
陶謨所云亦行有九德虞夏官人之法也告教
厥后周禮所云太宰詔王爵以馭貴也說文矣
語已辭也釋名宅擇也事卽下文云三事也牧
卽下文云牧夫也準卽上文云準人也謀面若
王制云爵人于朝也訓德若周禮云內史策命
之也釋詁則常也說文義已之威儀也周禮肆
師注鄭司農云古者書儀但爲義漢書翟方進
傳曰民儀九萬夫孟康注民之表儀是義民民
之有威儀者也言在昔夏之大臣相道有夏乃
王室大彊旁招俊乂以敬事上帝然必以道相

知以誠相信于九德之行乃敢詔告其后拜手稽首而言曰擇乃事擇乃牧擇乃準惟后爵之朝以謀其面用策命以訓其德而常任其所擇之人如此則三宅皆有九德而無徒有威儀之民矣

桀德惟乃弗作往任是惟暴德罔後。

弗當讀爲拂簡策偏旁摩滅也如大學是謂拂人之性之拂拂作往任多方所云不克靈承于旅罔丕惟進之恭也暴德多方所云洪紓于民也後如書序命微子啓代殷後之後史記夏本紀云湯封夏之後是桀不得有後也

亦越成湯陟丕釐上帝之耿命乃用三有宅克卽宅曰三有俊克卽俊嚴惟不式克用三宅三俊其在商邑用協于厥邑其在四方用丕式見德。

周頌王釐爾成箋云釐理也玉篇卽就也釋詁于曰也是曰猶于也王制升之司徒曰選士升之學曰俊士升諸司馬曰進士王制爲殷法三俊蓋卽三升也大傳收族故宗廟嚴鄭注嚴猶尊也史記游俠傳諸公以故嚴重之釋詁惟謀也說文式法也言亦越成湯陟位順理上帝之光命乃用三有宅而能成湯陟位順理上帝之宅三俊是以內而在商邑則用和于其邑外而在四方則用大法以顯湯之德

嗚呼其在受德賢惟羞刑暴德之人同于厥邦乃惟庶習逸德之人同于厥政帝欽罰之乃侔我有夏式商受命奄旬萬姓

釋詁賢強也說文引周書曰在受德恣云彊也字脫義同釋詁羞進也逸與佚同欽卽厥省釋詁厥興也歎息言其在受德疾很惟進用刑殺暴虐之人同于其邦亦惟羣習淫佚之人同于

其政于是上帝興起罰之乃使我撫有諸夏法
商先王之受命大治萬姓

亦越文王武王克知三有宅心灼見三有俊心以

敬事上帝立民長伯

玉篇灼明也說文引周書曰焯見三有俊心云
明也義同

立政任人準夫牧作三事

任人屬上讀五官獨言準者掌貢賦之出入尤
重也廣雅牧養也謂牧民之官若周禮鄉大夫
遂大夫也作當從後漢書廉范傳讀若佐詳盤
庚天子六卿甘誓云六事之人諸侯三卿文武
時尚爲西伯故云三事言文武時立政任用人
材內而準人外而牧夫其職事佐助三卿

虎賁綴衣趣馬小尹左右攜僕百司庶府大都小

伯藝人表臣百司太史尹伯庶常吉士

虎賁綴衣詳上文周禮趣馬掌贊正良馬而齊其飲食簡其六節釋言尹正也小尹正之卑者若膳夫上士而爲庖人以下九官之正酒正中士而爲酒人以下八官之正周禮射人注僕人與射人俱掌王之朝位引檀弓曰扶君卜人師扶右射人師扶左檀弓注卜當爲僕聲之誤也是左右攜僕若太僕射人也周禮司會以下官名司者凡三十九百司言其多也庶府若王府內府外府也周禮載師以大都小都之田任置地以小都之田任縣地大都小伯大都小都之伯互文以見若都宗人都司馬也藝人大都小都之伯互文祝司巫之屬表臣當從蔡傳合下百司爲句表之言外別乎上文以言之也周禮太史下大夫掌建邦之六典以逆邦國官府都鄙之治其職聯六官位非卿而任重故特舉其官尹伯正之尊者若司會中大夫而爲司書以下六官之長大司樂中大夫而爲樂師以下十九官之長釋言庶衆也言文武時內外臣工其衆皆有常之吉士

司徒司馬司空亞旅夷微盧烝三亳阪尹。

司徒司馬司空上文所云三事也左傳文十五年宋華耦來聘公與之宴辭請承命于亞旅杜注亞旅皆一大夫也成二年魯賜晉三帥三命之服亞旅皆一命之服杜注亞旅大夫也左傳昭十七年五雉為五工正夷民者也杜注夷平也微無考左傳桓十三年楚屈瑕伐羅羅與盧戎兩軍之杜注盧戎南蠻釋詁烝君也大雅文王烝哉毛傳烝君也鄭注三亳阪東成臯南轅轅西降谷也漢書地理志成臯即虎牢左傳襄二十一年使侯出諸轅轅杜注轅轅關在緱氏縣東南戰國策張儀曰塞轅轅緱氏之口輿地志其阪有十二曲道將去復還故名今河南鞏縣西南有轅轅山降谷未詳所在或以為卽續志穀成縣函谷關釋地陂者曰阪說文陂山脅也地理志密故國有大驪山應劭注密人不蒸密與成臯緱氏穀成地理志俱屬河南郡壤相錯接是三亳阪者文王伐密所闢之地也言文武時三卿大夫共平國微盧遠服之蠻則置其君

三毫新闢之阪則設之正

文王惟克厥宅心乃克立茲常事司牧人以克俊有德。

釋名宅擇也言文王惟能擇之于心乃能建立茲常伯常任三事及司牧之人以能進有德

文王罔攸兼于庶言庶獄庶慎惟有司之牧夫是訓用違。

漢書王莽傳縣宰缺者數年守兼師古注不拜正官令人守兼也罔攸兼即臯陶謨云無曠庶官也庶言若周禮宰夫掌諸臣之復大僕掌諸侯之復逆師氏掌以嬖詔王保氏掌諫王惡也庶獄若小司寇以五刑聽萬民之獄訟以五聲聽獄訟求民情士師察獄訟之辭以詔司寇斷獄弊訟誅士掌四方之獄訟司刑以五刑之法詔刑罰而以辨罪之輕重也庶慎若司刺掌三

刺三宥三赦之濃以贊司寇聽獄訟司約掌邦國及萬民之約劑若有訟則珥辟藏也有司之牧夫若周禮鄉大夫之職各掌其鄉之政教禁令遂大夫各掌其遂之政令也言文王權職任之輕重凡庶言庶獄庶愼無有曠其官令兼攝者而于鄉遂之大夫是訓戒其用命之違

庶獄庶愼文王罔敢知于茲

說文知詞也言庶獄庶愼文王惟制之以九刑不敢意爲輕重之詞于茲康誥所云愼罰也

亦越武王率惟敕功不敢替厥義德率惟謀從容德以竝受此丕丕基

釋言敕撫也替廢也義當讀如儀詳臯陶謨釋詁儀善也言亦越武王惟率循文王撫民之功不敢廢其善德惟謀和平有德者以竝受此丕丕之業

嗚呼孺子王矣繼自今我其立政立事準人牧夫

我其克灼知厥若。丕乃俾亂。相我受民。和我庶獄。庶愼。時則勿有閒之。

釋言若順也。廣雅時善也。詳臯陶謨。釋詁閒代也。歎息告孺子王。繼自今我其立政。建立茲三事。準人牧夫。我灼知其順。丕乃使治以助我所受之民。平我庶獄。庶愼。凡善其職者。勿使更代之。

自一話一言。我則末惟成德之彥。以乂我受民。

玉篇末盡也。釋詁惟思也。釋訓美士爲彥。史記魯世家云。周公見士。一飯三吐哺。一沐三握髮。

嗚呼。予旦已受人之徽言。咸告孺子王矣。繼自今文子文孫。其勿誤于庶獄。庶愼。惟正是乂之。

釋詁徽善也。云文子文孫。不敢斥言成王也。說文誤謬也。謬言用獄之輕重也。釋詁正長也。若

周禮大司寇小司寇也說文是直也

自古商人亦越我周文王立政立事牧夫準人則克宅之克由繹之茲乃俾乂

釋名宅擇也廣雅由用也郊特牲有由弭焉鄭注由用也方言繹長也釋言俾職也言自古商人及我周文王立政建立茲三事牧夫準人則能擇之克用長其任故其職多治

國則罔有立政用儉人不訓于德是罔顯在厥世繼自今立政其勿以儉人其惟吉士用勸相我國家

說文儉誠也儉利于上儉人也廣雅訓順也詳洪範說文引周書曰勿以儉人蓋古文音同假借說文勸勉力也

今文子文孫。孺子王矣。其勿誤于庶獄。惟有司之
牧夫。其克詰爾戎兵。以陟禹之迹。方行天下。至于
海表。罔有不服。以覲文王之耿光。以揚武王之大
烈。

周禮大司寇詰四方。鄭注。詰。謹也。陟。古文。隲。省。
廣雅。隲。定也。陟。禹迹。定。禹所畫之封域。令諸侯
不得相侵伐也。方。當讀爲旁。詳堯典。說文。旁。溥
也。釋詁。揚。續也。

嗚呼。繼自今後王立政。其惟克用常人。

并垂示將來。常人。臯陶謨云。彰厥有常也。

周公若曰。太史司寇蘇公。式敬爾由獄。以長我王
國。茲式有愼。以列用中罰。

周禮大史掌建邦之六典凡辨灋者攷焉左傳
成十一年劉子單子曰蘇忿生以溫爲司寇說
文式法也廣雅由用也王讀如中庸王天下之
王有當讀如又邶風不日有暄毛傳有又也以
列屬上爲句周公復言太史及司寇蘇公二人
能以法敬爾所用之獄以長我享祚茲刑法再
命其詳慎以陳用以中罰

尚書證義

平湖周用錫述

顧命

惟四月哉生魄。王不懌。甲子。王乃洮頰水。相被冕服。憑玉几。

漢書劉歆三統歷云。成王元年正月己巳朔。此命伯禽侯于魯之歲也。後三十年四月庚戌朔十五日甲子。王乃洮頰水也。按鄉飲酒義。月三日成魄。法言五百篇。月未望則載魄于西。既望則終魄于東。說文。月部。引周書曰。哉生霸。云。霸。月始生。霸然也。承大月二日。承小月三日。是諸書皆以哉生魄爲三日。蓋王以壬子三日不懌。至甲子十五日而病危。乃發顧命。故下云。病日瘳。既彌留也。歆之三統推日則密。而以生魄爲

望則與古法不同且與經文未合也馬注洮洮髮也類類面也鄭注相者正王服位之臣謂太僕冕元冕周禮司几筵凡大朝覲王位設黼展展前南向設左右玉几是王見羣臣憑玉几也說文引周書曰凭玉几云依几也讀若馮音義同

乃同召太保奭芮伯彤伯畢公衛侯毛公師氏虎臣百尹御事

鄭注公兼官以六卿為正次蓋召公兼太保畢毛稱公則兼太師太傅也書序巢伯來朝芮伯作旅巢命鄭注芮伯周同姓國在畿內杜預云馮翊臨晉縣芮鄉是也彤伯經傳未見通鑑周紀胡三省注彤地當在漢京兆鄭縣界今陝西華州西南有彤城蓋亦畿內采地也史記魏世家云魏之先畢公高與周同姓武王伐紂而高封于畢是畢公名高也左傳杜注畢在長安縣西北衛康叔所封左傳定四年祝佗曰康叔為司寇也史記周本紀云武王伐

紂毛叔鄭奉明水竹書紀年康王十二年秋毛懿公薨是毛公名鄭諡懿也左傳僖二十四年狄伐周獲毛伯是毛亦畿內采地也周禮師氏中大夫掌以嫪詔王者虎臣虎賁氏下大夫掌守王宮者釋言尹正也百尹御事衆正之官與其治事者

王曰嗚呼疾大漸惟幾病日臻旣彌留恐不獲誓

言嗣茲予審訓命汝

序卦傳漸進也列子力命篇季梁得疾七日大漸釋詁幾危也說文病疾加也釋詁臻至也說文彌久長也从長爾聲隸从弓釋言誓謹也

昔君文王武王宣重光奠麗陳敎則肄肄不違用克達殷集大命

宣重光文侯之命云丕顯也奠當讀如定周禮瞽矇世奠繫杜子春讀奠爲定詳禹貢麗古文

例詳多方奠麗定九刑之例陳敎布五品之敎也抑風旣詒我肄毛傳肄勞也說文違離也達讀如商頌撻彼殷武之撻古文省說文違古文撻或違誤爲達也

在後之伺敬迓天威嗣守文武大訓無敢昏逾。

論語伺而不愿集解孔曰伺未成器之人說文引周書曰在夏后之詞蓋古文作詞夏后則傳寫之誤也釋詁迓迎也說文逾越進也卽引書以證

今天降疾殆弗興弗悟爾尙明時朕言用敬保元子釗弘濟于艱難柔遠能邇安勸小大庶邦思夫人自亂于威儀爾無以釗冒貢于非幾。

釋詁殆危也釋言興起也漢費鳳碑不悟奄忽終是弗興廣雅時善也楚語觀射父曰夫人作享韋昭注夫人人人也釋詁亂治也說文冒冢而前也釋文貢馬鄭王作贛馬注贛陷也古貢

與贛通論語子貢樂記作子贛非如玉藻非辟之非非幾非辟之微者

茲既受命還出綴衣于庭越翼日乙丑王崩

還羣臣既受顧命而還反也周禮幕人掌帷幕幄帘綴之事鄭注在旁曰帷在上曰幕帷幕皆以布爲之四合象宮室曰幄王所居帳也帘王在幕居幄中坐上承塵也幄帘皆以繒爲之是綴衣帷幄之屬帷幄人所依必以綴相聯綴故謂之綴衣將發顧命卽王寢而張焉事訖徹去出之于庭中也

太保命仲桓南宮毛俾爰齊侯呂伋以二千戈虎賁百人逆子釗於南門之外延入翼室恤宅宗

論語君薨百官總已以聽于冢宰時召公以冢宰兼太保故書太保命也周禮敍官虎賁氏下大夫二人仲桓南宮毛時蓋居其官也漢書古今人表作中桓南宮髦中髦皆古文說文爰引

也史記齊世家太公卒子丁公呂伋立說文齊
太公子伋諡曰玃公玃丁古今文書齊侯者明
爲外諸侯而入覲在朝也周禮敘官虎士八百
人鄭注不言徒曰虎士則虎士徒之選有勇力
者此書虎賁卽虎士百人自是八百人中之百
人也釋言逆迎也公羊傳莊三十二年君薨稱
子某桓毛官卑不得徑迎元子故使引導齊侯
各執干戈率虎士百人備兵衛以往迎也文王
世子若內豎言疾則世子必親齊元而養膳宰
之饌必敬視之疾之藥必親嘗之是王哉生魄
不憚元子當侍疾今甲子同召六卿顧命而元
子不與當必王未疾時奉使而出比反而王崩
憂危之際故以兵衛迎之于南門之外也翼室
路寢兩翼之室卽東西夾室也檀弓周人殯于
西階之上旣殯在西則宅憂自當在東但旣殯
之後居倚廬在中門外東方此時未殯暫居翼
室當亦在東可知釋詁恤憂也白虎通宗尊也爲先
箋云親亡不得見恤憂也白虎通宗尊也爲先
祖主也

丁卯命作冊度。

周禮內史掌策命是命作者命內史作也作冊將以書成王之命詞卽下文太史所秉由賓階躋以御王者也度冊長短之數

越七日癸酉伯相命士須材狄設黼展綴衣。

鄭注癸酉蓋大殮之明日王注召公爲二伯相王室故曰伯相須當讀爲頒小爾雅頒布也玉藻大夫以魚須文竹釋文須音班頒與班音義相同頒與須形似相誤材檀弓云天子崩虞人致百祀之木可以爲棺槨者斬之是也頒材檀弓云旣殯旬而布材是也喪大記狄人設階鄭注狄人樂吏之賤者祭統作翟古通周禮司几筵王位設黼展鄭注斧謂之黼其繡白黑采以絳帛爲質依其制如屏風然幕人職大喪共帷幕帟綬鄭注帷以帷堂或與幕張之於庭帟在柩上蓋設黼展于路寢之戶外聯綬帷幄張于其所不言命者蒙上文命士也

牖閒南嚮敷重篋席黼純華玉仍几

周禮司几筵大朝覲大饗射封國命諸侯王位設黼依依前南鄉釋宮牖戶之閒謂之展是牖閒卽依前也禮器天子之席五重諸侯三重大夫再重是敷重布五重席也馬注篋纖簞說文引周書曰布重莫席云纖簞席也讀與篋同考工記白與黑謂之黼釋器緣謂之純鄭司農云純讀爲均服之均純緣也司几筵加次席黼純加纁席畫純設筦筵粉純今四坐敷重之制異者鄭注不用生時席新鬼神之事故也司几筵左右玉几鄭注左右有几優至尊也又凡吉事變几凶事仍几鄭注吉事王祭宗廟裸于室饋食于堂釋于祔每事易几神事文示新之也凶事謂凡奠几朝夕相因喪禮畧

西序東嚮敷重底席綴純文貝仍几

釋宮東西牆謂之序說文序東西牆也古者人君宮室之制前爲堂後爲室堂兩旁爲東西夾

室卽翼室中有牆以隔之謂之東西序後室之兩旁則爲東西房室中以東向爲尊戶在其東南牖在其西南堂以南向爲尊王位在戶外之西牖外之東所謂戶牖之間南嚮之坐也底古底省集韻底弱說文弱蒲子可以爲平席玉篇引書作敷重芪席廣韻芪底同綴如商頌爲下國綴旒之綴綴純其緣半下垂也

東序西嚮敷重豐席畫純雕玉仍几。

王注豐席莞孔傳同司几筵畫純鄭注畫畫雲氣也釋器玉謂之雕

西夾南嚮敷重筍席玄紛純漆仍几。

馬注筍筍箬說文筍竹箬也楚謂竹皮曰箬鄭注元紛純以元組爲之緣

越玉五重陳寶赤刀大訓弘璧琬琰在西序大玉

夷玉天球河圖在東序盾之舞衣大貝鼗鼓在西

房兌之戈和之弓垂之竹矢在東房

玉蓋王所服用者考工記玉人之事天子用全
上公用龍侯用璜伯用將鄭注全純玉也璜讀
爲餐展之展龍璜將皆雜名也卑者下尊以輕
重爲差玉多則重石多則輕公侯四玉一石伯
子男三玉二石然則全玉五玉也玉重石輕故
曰五重鄭注陳寶者方有大事以華國也說文
引周書曰陳宋云藏也音同赤刀以下周禮天
府云凡國之玉鎮大寶器藏焉若有大祭大喪
則出而陳之是也考工記夏后氏世室殷人重
屋周人明堂鄭注此三者或舉宗廟或舉王寢
或舉明堂互言之以明其同制今成王崩殯陳
設之地正是天子之路寢其制乃與世室明堂
之五室九階四旁兩夾窗異而與燕寢同者鄭
志答趙商張逸問以爲文王遷鎬因之周公制禮
雍其餘猶諸侯制度武王遷鎬因之周公制禮
建國土中乃立路寢明堂於洛邑若鎬京宮室
周公亦未及改作成王崩於鎬京故喪禮陳設
之處在路寢者有東西房如諸侯路寢之制不

同明堂制也

大輅在賓階面，綴輅在阼階面，先輅在左塾之前，次輅在右塾之前。

輅，周禮巾車典路及禮記明堂位禮器郊特牲皆作路，說文輅車輪前橫木也。巾，車王之五路。鄭注：王在焉曰路。儀禮覲禮注：君所乘車曰路。是輅當从古文作路。綴，古文作贅。鄭注：大路，玉路，贅次，次在玉路後，謂玉路之貳也。先路，象路，門側之堂，謂之塾，謂在路門內之西北面，與玉路相對也。次路，是象路之貳，與玉路之貳相對。在路門內之東北面，贅次是從後之言，二者皆爲副貳之車。不陳金路革路木路者，主于朝祀而已。周禮典路云：若有大祭祀，則出路大喪大賓客，亦如之。是大喪出路禮也。又鄭志答張逸問：此傳顧命陳設器物在路門內之路寢，下文云：立于畢門之內，畢門卽路門，是經有明文也。以賓階在西，阼階在東，皆是路寢之堂，階南嚮。

則西爲右東爲左塾是門側之堂在路門之兩旁北嚮則西爲左東爲右故在左塾前者與在西階者相對在右塾前者與在東階者相對也

二人雀弁執惠立于畢門之內

鄭注赤黑曰雀言如雀頭色也雀弁制如冕黑色但無藻耳惠狀蓋斜刃宜芟刈儀禮士冠禮賈疏云冕者俛也氏前一寸二分故得冕稱雀弁則前後平故不得冕名則雀弁似無旒之冕而微有低昂之分也周禮弁師注士變冕爲爵弁是二人雀弁者士也闕人注鄭司農云路門一曰畢門朝士注同又名虎門師氏居虎門之左鄭注虎門路寢門也

四人綦弁執戈上刃夾兩階祀

周禮弁師王之皮弁會五采玉璫鄭注會讀如士會之會會縫中也璫讀如薄借綦之綦綦結也皮弁之縫中每貫結五采玉十二以爲飾謂之綦詩云會弁如星又云其弁伊綦是也鄭注

又云韋弁皮弁再命之大夫璫飾二士變冕爲爵弁其韋弁皮弁之會無結飾是四人綦弁者大夫也說文戈平頭戟也廣雅祀砌也西京賦云金祀玉階是也夾兩階祀蓋夾階者二人一在西階之西一在阼階之東相嚮而立夾祀者二人一立于東南堂隅之東一立于西南堂隅之西當前廉之兩旁匡下皆南嚮經合言之者以四人兵服同也

一人冕執劉立于東堂一人冕執鉞立于西堂

周禮司服大夫之服自元冕而下是服冕者皆大夫也鄭注劉蓋今鐃斧鉞大斧序內半以前曰堂

一人冕執戣立于東垂一人冕執瞿立于西垂

說文戣周制侍臣執戣兵也垂遠邊也蓋東西夾旁之堂廉也鄭注瞿蓋今三鋒矛

一人冕執銳立于側階

鄭注銳矛屬說文引周書曰一人冕執銳讀若允云侍臣所執兵也鄭注凡此七兵或施矜或著柄周禮戈長六尺六寸其餘未聞長短之數側階東下階也東下階惟一人者康王方恤宅于東翼室兵衛宜盛且將從翼室出受顧命必當從東階降至庭中然後再從賓階躋至殯前則東下階乃王升降之處與西階不同故特置此一人也

王麻冕黼裳由賓階躋。

公羊傳莊三十二年君薨稱子某既葬稱子今書王者緣卽位之義所以大居正也鄭注麻冕三十升布冠也黼裳者冕服有文者也周禮享先王則衮冕鄭注衮之衣五章裳四章是九章王備有焉今裳用次八之黼蓋示變于常也孔傳用賓階升不敢當主

卿士邦君麻冕蟻裳入卽位。

卿士邦君之冕當各以其驚冕毳冕希冕元冕如助祭之服也周禮司服鄭注凡冕服皆元衣

黼裳今服蟻形色者正義云改其裳以示變于常也鄭注蟻色元卽位者卿西面諸侯北面

太保太史太宗皆麻冕彤裳太保承介圭上宗奉

同瑁由阼階躋太史秉書由賓階躋御王冊命

左傳文三年於是夏父弗忌爲宗伯魯語云夏父弗忌爲宗是宗伯亦稱宗其與太保太史同稱太者古太大多通也說文彤丹飾也蟻形止以色言皆無文者爾王黼裳則臣當殺矣說文承奉也釋器珪大尺二寸謂之玠亦名鎮圭考工記玉人之事鎮圭尺有二寸天子守之釋詁介大也不曰大而曰介者別于大圭之長三尺也介圭天子所寶今將傳顧命并傳此守位之主也鄭注上宗猶太宗變其文者宗伯之長大宗伯一人小宗伯二人凡三人使其上二人也禮典瑞祼圭一人奉瑁同蓋圭瓚可盛鬯酒者周爲器可以挹鬯祼祭謂之瓚考工記玉人之事祼圭尺有二寸有瓚以祀廟鄭注祼之言灌也

謂始獻酌奠也是奉同用以裸也周禮大宗伯
涖玉鬯鄭注玉禮神之玉也又大宗伯以玉作
六器以禮天地四方鄭注禮謂始告神時薦于
神坐書曰周公植璧秉圭是也又大宗伯以蒼
璧禮天以黃琮禮地以青圭禮東方以赤璋禮
南方以白琥禮西方以元璜禮北方鄭注禮神
者必象其類考工記玉人者事天子執冒四寸
以朝諸侯鄭注名玉曰冒者言德能覆蓋天下
也是禮神必有玉薦于神坐玉必象其類用瑁
者象先王之德能覆蓋天下也儀禮凶事設洗
于西階西南吉事設洗于東階東南此太保上
宗皆行吉事盥洗在東故由阼階升也釋詁秉
執也廣雅御進也小雅飲御諸友毛傳御進也
鄭注王此時正立賓階上少東太史東面于殯
西南隅讀策書以命王嗣位之事

曰王后憑玉几道揚末命命汝嗣訓臨君周邦率
循大卞變和天下用答揚文武之光訓

廣雅揚說也王注大卜大法孔傳率羣臣循大法

王再拜興答曰眇眇予末小子其能而亂四方以

敬忌天威。

方言眇小也班固幽通賦咨孤蒙之眇眇兮釋
詁亂治也言我微末小子其何能而治四方乎
惟敬畏天威以守天位

乃受同瑁王三宿三祭三咤上宗曰饗。

受同瑁者正義云上宗于王西南北面奉以授
王王一手受同一手受瑁也不言受介圭者孔
傳云太保奉以奠康王所位也宿當讀為縮簡
策偏旁摩滅也周禮甸師注鄭大夫云束茅立
之祭前沃酒其上酒滲下去若神飲之故謂之
縮縮浚也故齊桓公責楚不貢包茅王祭不共
無以縮酒縮或為茜說文禮祭束茅加于裸圭
而灌鬯酒是為茜春秋傳曰無以茜酒祭統君

執圭瓚裸尸是祭者裸祭也裸有二將祭用圭瓚盛秬鬯酒灌地求神然後迎尸及祭用圭瓚秬鬯獻尸尸受酒不飲但沃茅灌地此非吉祭不立尸蓋王代尸祭酒也咤當从釋文馬本作託說文託奠爵也丁故反周禮小宰凡祭祀贊王裸將之事鄭注凡鬱鬯受祭之啐之奠之孔傳祭必受福讚王曰饗福酒

太保受同降盥以異同秉璋以酢授宗人同拜王

答拜

孔傳受王所饗同下堂反於篚說文盥澡手也祭統君執圭瓚裸尸太宗執璋瓚亞裸是異同璋瓚也周禮大宗伯以赤璋禮南方是璋亦禮神之玉也太保秉璋者小雅載弄之璋毛傳臣之職也周禮司尊彝皆有罍諸臣之所昨也鄭注昨讀爲酢諸臣獻者酌罍以自酢不敢與王之神靈共尊是酢者人臣之獻如吉祭之亞裸也文王世子宗人授事鄭注宗人掌禮及宗廟

也魯語宗人夏父展曰非故也又魯語宗室之謀不過宗人韋昭注此宗人則上宗臣也亦用同姓若漢宗正用諸劉矣孔傳太保拜白已傳願命王答拜尊所受命

太保受同祭噤宅授宗人同拜王答拜

太保于既拜之後復受宗人之同而祭者王三祭太保再祭也說文噤嘗也卽引書文以證玉篇噤至齒也亦引書文王書上宗曰饗太保書噤者太保飲福至齒宗人不讚宅釋文徐邈音殆故反蓋亦讀爲託咤與宅皆簡策偏旁摩滅之誤也

太保降收諸侯出廟門俟

太保降而出應門不言出者于下言入見之省文也收者太史收冊書上宗收同瑁也諸侯卿士邦君也諸侯實出畢門言廟門者以殯所在神之故謂之廟俟者俟王出視朝也

尚書證義

平湖周用錫述

康王之誥

正義伏生以此篇合於顧命馬鄭王本此篇自高祖寡命已上內於顧命之篇王若曰已下始爲康王之誥

王出在應門之內太保率西方諸侯入應門左畢公率東方諸侯入應門右皆布乘黃朱賓稱奉圭兼幣曰一二臣衛敢執壤奠皆再拜稽首王義嗣德答拜

釋宮正門謂之應門考工記匠人應門二徹參

今鄭注正門謂之應門謂朝門也周禮天官宰

尚書證義

卷二十四

友伏齋本

夫闔人夏官司士大僕秋官小司寇朝士考工
記匠人諸職及禮記明堂位玉藻文王世子篇
竝言三朝及門以鄭注考之天子諸侯各有三
朝一外朝二治朝三燕朝但天子五門自外向
內數之一庫門外爲外朝朝士建其法小司寇掌
皐門內庫門外爲外朝朝士建其法小司寇掌
其政列三槐九棘設嘉石肺石致萬民而詢國
危國遷立君於斯斷獄訟於斯庫門內雉門外
則右社稷左宗廟不設朝雉門闔人掌其禁而
又謂之中門以其居五門之中設兩觀釋宮謂
之闕冢宰懸治象之法于象魏亦卽此蓋一物
三名應門內路門外爲治朝司士正其位宰夫
掌其法而大僕正王之位王日視朝于斯路門
內爲燕朝卽路寢大僕正其位掌擯相而族人
朝于斯圖宗人嘉事于斯燕射于斯王日聽政
于斯諸侯則三門庫門內爲外朝雉門內爲治
朝路門內爲燕朝雉門無皐應魯亦無皐應但
爲天子皐門制雉門爲天子應門制雉門惟此爲
是王出在應門之內者正治朝也公羊傳隱五
年自陝而東周公主之自陝而西召公主之王

注畢公代周公爲東伯故率東方諸侯廣雅布
列也鄭風乘乘黃毛傳四馬皆黃也朱鄭駁異
義以爲朱鬣伏生大傳云西伯旣伐耆紂囚之
牖里散宜生遂之犬戎氏取美馬駿身朱鬣雞
目者陳於紂之庭是古者獻馬貴朱鬣也馬惟
二王之後享禮用之而云皆布乘黃朱者觀禮
諸侯享天子匹馬卓上九馬隨之此因喪禮而
行朝享故從畧并從同也周禮大行人掌大賓
之禮鄭注大賓要服以內諸侯玉人之事命主
九寸謂之桓圭公守之命圭七寸謂之信圭侯
守之命圭七寸謂之躬圭伯守之鄭注命圭者
王所命之圭也朝覲執焉居則守之鄭注命圭者
六幣圭以馬璋以皮璧以帛琮以錦琥以繡璜
以黼此六物者以和諸侯之好鄭注六幣所以
享也曲禮鄭注諸侯春見曰朝受摯於朝受享
於廟秋見曰覲一受之於廟是先朝後享地有
不同而言賓稱奉圭兼幣者鄭注此朝兼享禮
也與常禮不同蓋二禮同時竝行於朝以喪中
變其常也壤奠覲禮云庭實惟國所有大戴禮
朝事篇云奉國地所出重物而獻之明臣職也

正義凡享禮每一國事畢乃更餘國復入其朝則侯氏總入此既諸侯總入因新朝嗣王兼行享禮故云一二臣衛敢執壤奠明非一也義當讀如儀周禮肆師注鄭司農云古者書儀但爲義王義司儀所云詔王儀也言王儀以嗣先王之德答諸侯之拜

大保暨芮伯咸進相揖皆再拜稽首曰敢敬告天子皇天改大邦殷之命惟周文武誕受羌若克恤

西土

說文羌古文誘進善也釋詁誘進也亦與牖通史記西伯囚羌里大傳作牖里大雅天之牖民韓詩作天之誘民老子鑒遠篇不窺美見天道釋詁若善也誕受羌若受羣臣之進善也倉頡篇恤愛也

惟新陟王畢協賞罰戡定厥功用敷遺後人休今

王敬之哉。張皇六師，無壞我高祖寡命。

稱新陟王者，時未諡也。釋詁：戡，定也。戡，定厥功，謂誅武庚伐奄也。說文：數，岐也。引周書曰：用數遺後人。數，數也。篆隸文釋言：皇，正也。小雅：以作六師。犬雅：六師及之。整我六師。鄭志：答趙商問：釋臨碩難竝以爲卽六軍也。左傳：昭十七年，鄭子曰：我高祖少皞摯之立也。盤庚曰：肆上帝將復我高祖之德。是古者以受命之君爲高祖。周之高祖，文王也。寡，當讀爲宣。說卦：巽其於人也，爲寡髮。釋文：寡又作宣。虞翻注：爲白故宣髮。考工記：半矩謂之宣。鄭注：引易巽爲宣髮，是寡與宣古通。宣命，卽顧命云。宣，重光也。成王之末年，承平日久，召公恐弛而不張，故于康王嗣位之初，敬告以張正六軍，無壞高祖宣命。雜記所謂一張一弛，文武之道也。

王若曰：庶邦侯甸男衛，惟予一人釗報誥。

釋文：馬本從此以下爲康王之誥。歐陽大小夏侯同爲顧命。

昔君文武丕平富。不務咎。底至齊信。用昭明于天下。則亦有熊羆之士。不二心之臣。保乂王家。用端命于上帝。皇天用訓厥道。付畀四方。

說文富厚也。言文武和平篤厚。不務咎人。釋言底致也。廣雅訓順也。釋文訓亦作馴。馴古訓字。史記索隱云。徐廣讀馴曰訓。

乃命建侯樹屏。在我後之人。今予一二伯父。尚胥暨顧。綏爾先公之臣。服于先王。雖爾身在外。乃心罔不在王室。用奉恤厥若。無遺鞠子羞。

釋詁在存也。聘禮記子以君命在寡君。鄭注在存也。左傳襄二十六年。衛獻公使讓太叔文子曰。吾子獨不在寡人。杜注在存問之也。又隱十一年曰。君與滕君辱在寡人。成四年曰。君若辱

在寡君襄三十一年曰無若諸侯之屬辱在寡君者何吳語曰必率諸侯以顧在予一人竝同此義曲禮天子同姓曰伯父釋詁暨與也綏當讀爲綏明堂位夏后氏之綏鄭注綏讀爲綏周禮夏采以乘車建綏鄭注綏當作綏字之誤也又云士冠禮及玉藻冠綏之字故書亦多作綏釋詁綏繼也言庶幾相與顧念繼爾先公之臣服于先王恤憂也若善也釋言鞠稚也

羣公既皆聽命相揖趨出王釋冕反喪服

鄭注羣公謂諸侯與王之三公諸臣亦在焉王釋冕反喪服朝臣諸侯亦反喪服禮喪服臣爲君諸侯爲天子皆斬衰

尚書證義

平湖周用錫述

呂刑

周語堯胙四岳國命爲侯伯賜姓曰姜氏曰有
呂謂其能爲禹心膂也說文昔太嶽爲禹心膂
之臣故封呂侯是呂四嶽之裔也水經注宛西
呂城四嶽佐禹治水虞夏之際受封於呂史記
齊世家徐廣注呂在南陽宛縣西括地志故申
城在鄧州南陽縣北三十里故呂城在鄧州南
陽縣西四十里兩國相距蓋四十八里有奇也
禮記孝經引此篇俱作甫刑孔傳云呂侯見命
爲卿後爲甫侯故稱甫刑史記周本紀亦云甫
侯言于王作修刑辟此後人以其子孫國號名
之猶叔虞封唐其子燮父遷晉史記因稱晉世
家也

惟呂命王享國百年耄荒度作刑以詰四方

鄭注呂侯受王命入爲三公書說云周穆王以
呂侯爲相史記周本紀云穆王卽位春秋已五
十矣立五十五年崩是享國百年乃從生年而
數也曲禮八十九十曰耄篆文作薹說文老部
年九十曰薹亦與眊通說文目部眊目少精也
虞書耄字从此漢書武帝紀元狩元年詔云哀
夫老眊孤寡鰥獨師古注眊古髦字髦老稱也
平帝紀元始二年詔云及眊悼之人師古注眊
者老稱又與旄通射義旄期稱道不亂孟子反
其旄倪是也荒字當从蘇氏屬下爲句釋名荒
大也晉語在周頌曰天作高山大王荒之荒大
之也說文度法制也荒度者舜典之金曠惟官
刑教刑今寬大其法制凡入五刑者皆得以罰
緩贖也周禮大司寇之職以佐王刑邦國詰四
方鄭注詰謹也引書曰王旄荒度作詳刑以詰
四方大傳又作鮮度作刑以詰四方大雅度其
鮮原毛傳大山曰鮮是鮮亦大也竹書紀年穆
王五十一年作呂刑命甫侯于豐

王曰若古有訓蚩尤惟始作亂延及于平民罔不

寇賊鴟義姦宄奪攘矯虔

史記五帝本紀神農氏世衰諸侯相侵伐蚩尤最暴虐黃帝乃徵師諸侯與蚩尤戰于涿鹿之野遂擒殺蚩尤而諸侯咸尊軒轅為天子逸周書嘗麥解黃帝執蚩尤殺之于中冀名之曰絕轡之野水經注涿水出涿鹿山東北流逕涿鹿縣故城南黃帝與蚩尤戰于涿鹿之野卽是處義讀如儀周禮肆師注鄭司農云古者書儀但為義庚桑子曰人實鴟義鴟義亦卽鴟夷史記伍子胥傳盛以鴟夷革揚雄酒箴不如鴟夷蓋頑兇之日漢書武帝紀矯虔吏因勢侵暴注引韋昭曰詐稱為矯強取為虔說文引周書曰斂攘矯虔云斂強取也義同

苗民弗用靈制以刑惟作五虐之刑曰法殺戮無辜爰始淫為劓刵桷黥越茲麗刑并制罔差有辭

史記三苗在江淮荊州戰國策吳起對魏文侯曰昔三苗之居左有彭蠡右有洞庭文山在其

南衡山在其北鄭注著其氏而謂之民民者異也言未見仁道靈古與合通緇衣引作苗民匪用命猶令也謂不用天子之命令也釋詁淫大也如左傳襄十四年云增淫也說文刀部剕刑鼻也重文剕云剕或从鼻則斷耳也支部斲去陰之刑也引周書曰剕斲蓋古文作斲今文作桮也下文五刑有剕無則則亦當從說文爲別也黑部黥墨刑在面也重文作黥周禮小司寇以八辟麗邦法鄭注麗附也刑剕桮黥本先王之典刑苗民始增淫此四者以附典刑謂凡罪之輕者增入于刑之重也差若周禮保氏注九數差分之差罔差有辭若周禮朝士注鄭司農云不得乞鞫也鄧展曰漢律有故乞鞫司馬貞案晉令云獄結竟呼囚鞫語罪狀囚若稱枉欲乞鞫者許之也

民興胥漸泯泯焚罔中于信以覆詛盟虐威庶戮方告無辜于上帝監民罔有馨香德刑發聞

惟腥

莊子胠篋篇知詐漸毒荀子不苟篇小人知則攫盜而漸議兵篇招近募選隆執詐尚功利是漸之也正論篇上幽險則下漸詐是漸之為言欺詐也逸周書祭公解泯泯芬芬孔晁注泯芬亂也芬芬同中讀如月合律中之中說文詛訓也周禮詛祝作盟詛之載辭鄭注盟詛主于要誓大事曰盟小事曰詛廣雅方大也德字當從蔡傳屬上讀說文腥肉中生小息肉也胜犬膏臭也張參五經文字云胜先丁反腥先寧反今經典通用腥為胜

皇帝哀矜庶戮之不辜報虐以威遏絕苗民無世在下。

皇帝堯也說文報當罪人也史記張釋之傳廷尉奏當一人犯蹕當罰金索隱曰崔浩云當謂處其罪也報虐以威舜登用之年報其虐以兵威國策云舜伐三苗是也遏絕舜典云竄三苗

于三危也。無世在下，不使世及其國也。

乃命重黎，絕地天通，罔有降格。羣后之逮在下，明

明棐常，鰥寡無蓋。

楚語觀射父曰：少皞氏之衰也，九黎亂德，顓頊受之，乃命南正重司天以屬神，火正黎司地以屬民。其後三苗復九黎之惡，堯復育重黎之後，不忘舊者，使復典之。以至于夏商，法言義近重和，近黎是義，承重和承黎重黎，即堯典之義和也。伏生大傳：舜巡狩四岳，祀太山、霍山，皆奏義伯之樂。華山、宏山，奏和伯之樂。是舜徵庸攝位之年，義和仍居其職也。絕地天通，楚語云：民神不雜也。降格，若左傳有神降于莘，申生請于帝也。釋詁：逮，與也。釋訓：明明，明察也。釋詁：棐，輔也。蓋，當讀如割。釋言：蓋，割裂也。蓋，割雙聲。古多互讀。詳君奭、廣雅：割，害也。蓋，三苗復九黎之惡，家爲巫史，民神同位，禍災薦臻，堯命重黎復其舊職，司天以屬神，司地以屬民，使無相侵瀆，于是罔

有假託鬼神而降格。凡羣后之與在下者皆明。明以輔典常而鰥寡遂無有害。

皇帝清問下民。鰥寡有辭于苗。德威惟畏。德明惟明。

釋言。察。清也。是清猶察也。大傳云。鰥寡困于三苗之虐。有辭以諫也。表記。鄭注。德所威則人皆畏之。言服罪也。德所明則人皆尊寵之言得人也。

乃命三后。恤功于民。伯夷降典。折民惟刑。禹平水土。主名山川。稷降播種。農殖嘉穀。三后成功。惟殷于民。

典。舜典云。五典也。降典。左傳文十八年。季文子曰。使布五教于四方。父義。母慈。兄友。弟共。子孝也。折。如賁卦折獄之折。釋詁。惟。謀也。惟刑。若王制云。王命三公參聽之也。漢書刑法志。引作哲。

民惟刑平水土孟子云水由地中行也主名山川釋水云從釋地已下至九河皆禹所名也廣雅農勉也管子大匡篇耕者用力不農有罪無救農殖大戴禮五帝德云使后稷播種務勤嘉穀是也廣雅殷大也殷于民墨子尚賢篇引此說之云萬民被其利終身無已也

士制百姓于刑之中以教祗德

不言皋陶者舜登庸之年皋陶未爲士也後漢書楊震傳震孫賜曰三后成功惟殷于民咎繇不與焉百姓世族之得姓者詳堯典後漢書梁統傳引作爰制百姓之得姓者詳堯典後漢書梁爲言不輕不重之謂衷與中古通蓋卽舜典所云鞭作官刑朴作教刑金作贖刑也周禮朝士帥其屬而以鞭呼趨且辟禁慢朝錯立族談者條狼氏大夫不關鞭五百小胥巡舞列而撻其怠慢者說文鄉飲酒罰不敬撻其背是鞭朴皆所以懲不敬故云以教祗德也

穆穆在上明明在下灼于四方罔不惟德之勤故

乃明于刑之中。率父于民。棐彝。

釋訓穆穆敬也。釋詁率循也。釋詁典彝訓同。是彝猶典也。言天子穆穆恭己于上。羣臣明明布行于下。用照臨四方。諸侯罔不以德勤其職。故乃明于刑之不輕不重。循此治民。而以弼五典之教。

典獄。非訖于威。惟訖于富。敬忌。罔有擇言在身。惟克天德。自作元命。配享在下。

大雅何神不富。毛傳富福也。郊特牲富者福也。古富與福通。謙卦鬼神害盈而福謙。京房作富謙表記。鄭注忌之言戒也。孝經口無擇言。身無擇行。太元經捏曰言正則無擇。行正則無爽。法言吾子篇君子言也。無擇聽也。無淫擇則亂。淫則辟。是擇言亂言也。逸周書謚法解愛民在刑曰克。作當從後漢書廉范傳讀若佐詳盤庚配享周禮司勳云凡有功者祭于大烝也。言當時

典獄之臣非終于立威惟終于作福必敬必戒罔有亂言出于其身蓋惟矜恤以天德故功佐大命而祭于大烝

王曰嗟四方司政典獄非爾惟作天牧今爾何監非時伯夷播刑之迪其今爾何懲惟時苗民匪察于獄之麗罔擇吉人觀于五刑之中惟時庶威奪貨斷制五刑以亂無辜上帝不蠲降咎于苗苗民無辭于罰乃絕厥世

廣雅牧養也左傳襄十四年師曠曰天生民而立之君使司牧之釋詁時是也播刑若周禮大司寇正月之吉始和布刑于邦國都鄙乃縣刑象之灋于象魏也釋詁迪作也麗古文例詳多方釋名庶撫也庶威撫威虐也奪貨取貨賄也小雅吉蠲爲饌毛傳蠲潔也左傳襄九年明神

不蠲要盟杜注同周語明神弗蠲韋昭注竝同

王曰嗚呼念之哉伯父伯兄仲叔季弟幼子童孫
皆聽朕言庶有格命今爾罔不由慰日勤爾罔或
戒不勤天齊于民俾我一日非終惟終在人爾尙
敬逆天命以奉我一人雖畏勿畏雖休勿休惟敬
五刑以成三德一人有慶兆民賴之其寧惟永

釋文曰亦作曰勤上文云惟德之勤也廣雅或有也齊如論語齊之以刑之齊釋言俾職也俾我當從蔡傳屬下一日爲句釋詁在察也廣雅休喜也周語爲晉休感韋昭注休喜也周禮師氏以三德教國子一曰至德以爲道本二曰敏德以爲行本三曰孝德以知逆惡左傳閔元年卜偃曰天子曰兆民諸侯曰萬民釋詁寧安也永長也言凡我同姓之人皆聽朕言庶有以感

格天命。今爾無不用相。安慰曰：惟德之勤，爾無有相戒，以不勤者。蓋天之以刑齊民，職于我之。一日，其有大罪，非終小罪，惟終者當詳察其人。爾庶幾敬，迓天命，以承予一人。事雖可畏，汝勿畏。事雖可喜，汝勿喜。惟敬，伯夷所播之五刑，以成師氏所教之三德。苟予一人有福，則兆民皆有依賴，其治安可以久長。

王曰：吁！來！有邦有土，告爾祥刑。在今爾安百姓，何擇非人？何敬非刑？何度非及？

祥古文作詳。鄭注：審察之也。後漢書劉愷傳亦作告。爾詳刑，祥與詳古通。履卦視履考祥，釋文云：本亦作詳。君奭：其終出于不祥。漢石經作不詳。說文及逮也。徐云：及捕人也。言何所擇者，非用人乎？何所敬者，非用刑乎？何所度者，非捕逮乎？

兩造具備，師聽五辭。五辭簡孚，正于五刑。五刑不

簡正于五罰五罰不服正于五過。

周禮大司寇以兩造禁民訟鄭注造至也使訟者兩至史記徐廣注造一作遭古遭與造通詳大誥釋詁師衆也辭不以數限而云五辭者刑以辭定凡入于五刑各有辭因爲五辭也師聽五辭周禮云鄉士聽其獄訟察其辭辨其獄訟異其死刑之罪而要之甸而職聽于朝司寇聽之斷其獄弊其訟于朝羣士司刑皆在各麗其灋以議獄訟是也遂士縣士方士竝同王制鄭注簡誠也謂罪狀實也釋詁孚信也謂有信驗也言訟者兩造俱備鄉則甸遂則二甸縣則三甸都則三月大司寇小司寇羣士司刑衆聽其入于五刑之要辭五辭得罪狀之實有信驗者則考正之于五刑而成其獄訟其或考于五刑與所犯之罪不實則從輕典而考正于五罰使出金贖罪其或考于五罰而其情不能甘服則恐有冤抑之隱而考正之于五過其無五過者則仍罰之有者赦之

五過之疵。惟官。惟反。惟內。惟貨。惟來。其罪惟均。其審克之。

釋詁。疵。病也。玉篇。惟。有也。官。威勢也。反。報復也。內。讀若納。漢書路溫舒尚德緩刑書云。鍛鍊而內。內之也。貨。賕也。說文。賕。以財物枉法相謝也。漢律有受賕之條。來。當從釋文。馬本作求。云有求。請賕也。漢律諸為人請求于吏。以枉法而事已行者。皆屬司寇。言五過之病。害于法。蓋鄉遂士之聽獄訟。有因威勢抑制者。有因報復嫌怨者。有因周內文致者。有因受賕鬻獄者。有因聽請賕徇者。此五罰之所以不能折服。而必有以正之。凡此五者之過。其害法不同。而其昏墨之罪。則惟均。當詳審矜恤之。

五刑之疑有赦。五罰之疑有赦。其審克之。

王制。疑獄。汜與眾共之。眾疑。赦之。鄭注。不言五過之疑。有赦者。過不赦也。禮記云。凡執禁以齊。

衆不赦過

簡孚有衆惟貌有稽無簡不聽具嚴天威

簡孚有衆周禮小司寇云訊羣臣訊羣吏訊萬民也周禮小宰聽師田以簡稽鄭注稽猶計也合也惟貌有稽小司寇云辭聽色聽氣聽耳聽目聽也說文引周書曰惟緇有稽云旄絲也蓋古文無簡不聽王制鄭注云簡誠也無其誠者不論以爲罪言聽五辭者必誠信于有衆不可獨信于一人又必卽其容貌之流露而合之其無罪狀之實者則不論以爲罪凡此俱所以敬天威而不敢妄刑也

墨辟疑赦其罰百鍰閱實其罪劓辟疑赦其罰惟倍閱實其罪剕辟疑赦其罰倍差閱實其罪宮辟疑赦其罰六百鍰閱實其罪大辟疑赦其罰千鍰

閱實其罪。墨罰之屬千。劓罰之屬千。剕罰之屬五。百宮罰之屬三百。大辟之罰其屬二百。五刑之屬三千。上下比罪。無僭亂辭。勿用不行。惟察惟法。其審克之。

釋詁。辟罪也。說文。緩。錡也。卽引書罰百緩。又錡字云。北方以二十兩爲三錡。考工記。冶氏。戈重三錡。鄭注。引說文云。錡。緩也。今東萊稱或以大半兩爲鈞。十鈞爲緩。緩重六兩大半兩。又挑氏爲劓重九錡。謂之上制。鄭注。重三斤十二兩。是緩與錡同也。史記。周本紀。作率。徐廣曰。率。卽緩也。音刷。索隱云。舊本率亦作選。漢書。蕭望之列傳。張敞曰。甫刑之罰小過赦薄罪。贖有金。選之品。應劭注。選。音刷。金銖兩名也。師古注。字本作錡。錡。卽緩也。史記。平準書。有白選。索隱云。蘇林音選擇之。選。包愷及劉氏音息。戀反。尙書。大傳。夏后氏不殺不刑。死罪罰一千。饌。漢書。食貨志。

作撰音同周禮職金疏云今文作率說云一率
六兩古文作緩說云一緩十一銖二十五分銖
之十三或作率或作選或作饌或作撰皆異
異文音近而假借者也古贖罪皆用銅漢始改
用黃金但少其斤兩金與銅相敵故鄭駁異義
云贖死罪千緩六兩大半兩為四百一十六
斤十兩大半兩銅與今贖死罪金三斤為價相
依附也說文閼察也荆史記周本紀作贖伏生
大傳同是今文為贖古文為荆也馬注倍二百
為四百緩也差者又加四百之三分之一凡五
百三十三緩三分緩之一也周禮司刑掌五刑
之灋以麗萬民之罪墨罪劓罪宮罪剕罪殺罪
各五百鄭注夏刑大辟二百贖辟三百宮辟五
百劓墨各千周則變焉則三千乃夏刑之屬穆
王又變周從夏書序所云訓夏贖刑也王制凡
聽五刑必察小大之比以成之鄭注已行故事
曰比疏云比例也漢書陳忠傳有決事比說文
僭假也僭亂辭漢書路溫舒尚德緩刑書云囚
人不勝痛則飾辭以視之吏治者利其然則指
道以明之也不行已除之刑屬也若司刑注鄭

司農云漢孝文帝十三年除肉刑也察王制云
悉其聰明致其忠愛以盡之也言五刑之屬總
計三千或上刑或下刑必例于罪不可假借錯
亂其辭勿用已除之屬惟明察其法而詳審矜
恤之

上刑適輕下服下刑適重上服輕重諸罰有權刑

罰世輕世重惟齊非齊有倫有要

左傳昭十五年民知所適杜注適歸也世輕世
重周禮司刑掌五刑之灋凡二千五百此三千
復變從夏刑墨劓則增于舊宮大辟則減其半
詳其小而寬其大因世制宜也有倫王制云凡
聽五刑之訟必原父子之親立君臣之義以權
之也有要王制云意論輕重之序慎測淺深之
量以別之也言或比上刑而情有歸于輕者則
減等以下刑服之或比下刑而情有歸于重者
則加等以上刑服之宜輕宜重有權焉以酌其
平不可執一也蓋刑罰之輕重因世制宜惟在

齊其所不齊使有倫理有首要

罰懲非死人極于病非佞折獄惟良折獄罔非在中。察辭于差非從惟從哀敬折獄明啓刑書胥占。咸庶中正其刑其罰其審克之獄成而孚。輸而孚其刑上備有并兩刑。

敬當讀爲矜伏生大傳作哀矜哲獄釋言隱占也是占猶隱也漢書師古注占謂自隱度說文輸委輸也廣雅尙上也上猶尙也言罰緩所以懲戒未嘗至死而其人已極于病故非佞人能折獄惟良士折獄輕重罔不在中或察辭于參差不從其辭而惟從其情蓋良士以哀矜折獄明啓刑書相隱度皆期于中正其用刑用罰能詳審矜恤之故獄成而可信或以罰緩輸者亦可信其刑又以備爲尙有一罪而介于兩刑者則并之以告

王曰。嗚呼。敬之哉。官伯族姓。朕言多懼。朕敬于刑。有德惟刑。今天相民。作配在下。明清于單辭。民之亂罔不中聽。獄之兩辭。無或私家于獄之兩辭。獄貨非寶。惟府辜功。報以庶尤。永畏惟罰。非天不中。惟人在命。天罰不極。庶民罔有令政在于天下。

釋詁。惟。謀也。相。視也。配。對也。釋言。察。清也。是。清猶察也。小雅。俾爾單厚。箋云。單。盡也。釋詁。亂。治也。家。皐陶謨云。有家也。廣雅。府。取也。說文。報。當罪人也。尤。古。就省。說文。引。周書。曰。報。以。庶。就。云。罪也。釋詁。在。察也。合。善也。王。又。歎。息。言。敬。之。哉。凡。百。官。之。正。伯。同。族。之。子。姓。朕。言。多。戒。懼。者。朕敬。慎。于。刑。而。以。有。德。者。謀。刑。也。今。上。帝。監。觀。有赫。典。獄。者。對。天。在。下。當。明。察。于。辭。之。盡。凡。治。民之。獄。在。權。其。輕。重。以。中。聽。兩。造。之。辭。不。可。瞻。徇。有。家。者。于。獄。之。兩。辭。鬻。獄。之。貨。非。可。爲。寶。徒。取。

罪狀報之者有五過當常戒懼其罰蓋非天德不能以折中惟人審察其死生之命若天罰不能權于至當則庶民弗克用勸亦罔識新播之善政在于天下矣

王曰嗚呼嗣孫今往何監非德于民之中尙明聽之哉哲人惟刑無疆之辭屬于五極咸中有慶受王嘉師監于茲祥刑

非德屬上爲句哲人謂呂侯也釋詁惟謀也說文屬連也五極五刑之至法也釋詁嘉善也王又歎息呼嗣孫自今以往何所監者非天德乎能監天德則于民用刑之中庶幾能明聽之哉蓋朕命哲人謀刑從夏刑之輕增周刑五百凡未竟之五辭附屬于五刑之至法咸不輕不重而有慶爾受王者之善法其視于此詳刑

尚書證義

平湖周用錫述

文侯之命

王若曰。父義和。不顯文武。克慎明德。昭升于上。敷聞在下。惟時上帝。集厥命于文王。亦惟先正。克左右昭事。厥辟。越小大謀猷。罔不率從。肆先祖懷在位。

鄭注。義讀爲儀。儀仇皆訓匹也。故名仇字儀王。風懷哉懷哉。箋云懷安也。

嗚呼。閔予小子。嗣造天不愆。殄資澤于下民。侵戎我國家。純卽我御事。罔或者壽俊。在厥服。予則罔

克曰。惟祖惟父。其伊恤朕躬。嗚呼。有績予一人。永綏在位。

造當讀如遭。大誥予造天役。漢書作予遭天役。呂刑兩造具備。史記徐廣注作兩遭。具備蓋古通。方言戎拔也。江淮南楚之閒曰戎。戰國秦策樂羊拔中山甘茂拔宜陽是也。純字當屬下讀。考工記諸侯純九大夫純五。鄭注純猶皆也。卽古文節省說卦傳節止也。凡戰而被獲曰止。左傳僖十五年。駘秦伯將止之。晉語將止不面夷死是也。史記大戎殺幽王于驪山下并殺鄭桓公。則其時御事之被獲者多矣。廣雅或有也。釋詁伊維也。

父義和。汝克昭乃顯祖。汝肇刑文武。用會紹乃辟。追孝于前文人。汝多修扞我于艱。若汝予嘉。

釋言肇敏也。釋詁刑法也。周禮司勳戰功曰多方言修長也。言汝戰功長扞衛我于艱難。左傳

隱六年周桓公曰周之東遷晉鄭焉依是也說文引周書曰毀我于艱云止也

王曰父義和其歸視爾師寧爾邦用賚爾秬鬯一卣彤弓一彤矢百盧弓一盧矢百馬四匹父往哉柔遠能邇惠康小民無荒寧簡恤爾都用成爾顯德

王制諸侯賜弓矢然後征賜圭瓚然後爲鬯簡恤周禮大宗伯大均之禮恤衆也大田之禮簡衆也

尙書證義

平湖周用錫述

費誓

說文米部引周書作𦵏誓蓋古文周禮鄭注引作𦵏誓𦵏與𦵏形似相誤史記作𦵏大傳作鮮其異無考

公曰嗟。人無譁。聽命。徂茲淮夷。徐戎竝興。

徂當作徂。形似之誤。說文徂拙也。廣雅徂鈍也。但茲猶蠢爾。

善敕乃甲冑。敵乃干。無敢不弔。備乃弓矢。鍛乃戈矛。礪乃鋒刃。無敢不善。

說文敕擇也。敵連繫也。皆引書文以證釋詁。弔至也。

今惟淫舍牯牛馬。杜乃獲。斂乃寘。無敢傷牯牯之傷。汝則有常刑。

說文牯牛馬牢也。釋文杜又作斂。說文斂閉也。音義同。鄭注山林之田。春始穿地爲寘。或設獲其中以遮獸。獲柞鄂也。說文斂塞也。廣雅同。

馬牛其風。臣妾逋逃。無敢越逐。祇復之。我商賚汝。乃越逐不復。汝則有常刑。無敢寇攘。踰垣牆。竊馬牛。誘臣妾。汝則有常刑。

廣雅風放也。左傳僖四年惟是風馬牛不相及。賈逵注風放也。牝牡相誘謂之風。釋言復返也。廣雅商度也。

甲戌。我惟征徐。戎峙乃糗糧。無敢不逮。汝則有大

刑。魯人三郊三遂。峙乃楨榦。甲戌。我惟築。無敢不供。汝則有無餘刑。非殺。魯人三郊三遂。峙乃芻茭。無敢不多。汝則有大刑。

釋詁。峙。具也。說文。糗。熬米麥也。糧。穀也。食部引周書曰。峙乃餼。糧。釋言。逮及也。馬注。大刑。死刑。若陳羣新律序云。乏軍之興。要斬也。馬注。楨榦。皆築具。楨在前。榦在兩旁。鄭注。無餘刑。非殺者。謂盡孥其妻子。不遺種類。在軍使給廩。役反則入於罪隸。春藁不殺之。說文。茭。乾芻也。

尚書證義

平湖周用錫述

秦誓

公曰。嗟我士。聽無譴。予誓告汝羣言之首。

曾子問。今之祭者。不首其義。鄭注。首。本也。

古人有言曰。民訖自若是。多盤。責人斯無難。惟受責。俾如流。是惟艱哉。

釋詁。從。自。也。是。自。猶。從。也。釋言。若。順。也。釋詁。般。樂。也。與。盤。通。釋詁。俾。從。也。言。凡。民。之。情。盡。以。從。順。爲。樂。蓋。責。人。不。難。惟。受。責。從。如。流。是。惟。難。哉。

我心之憂。日月逾邁。若弗云來。

廣雅云有也山井鼎考古本作員云與員古通商頌景員維河箋云員古文作云鄭風聊樂我員釋文員本作云小雅昏姻孔云釋文云本作員廣雅員有也是文異義同言我心之憂日月遂往若弗有來雖欲改過無及也

惟古之謀人則曰未就予忌惟今之謀人姑將以爲親雖則云然尙猷詢茲黃髮則罔所愆

忌當讀爲基說文心部引周書曰來就基今經無此文詳讀之來蓋未字之誤而古文忌作基少一予字也廣雅基志也言不肯就予之意也

番番良士旅力旣愆我尙有之仡仡勇夫射御不違我尙不欲惟截截善謫言俾君子易辭我皇多有之

番古幡省史記秦本紀正義番番當作幡幡白
貌族古斨省左傳昭二十年是不有寡君也杜
注有相親有也說文仡勇壯也卽引書以證公
羊傳宣六年祁彌明力士也仡然從趙盾而入
何休注仡然壯勇貌說文諷便巧言也卽引書
以證戈部又引書莪莪巧言云賊也公羊傳文
十二年又引作惟譏善諄言莪卽譏之文省
賊卽截之聲轉皆形容巧言之貌公羊傳又引
作俾君子易怠何休注易怠猶輕惰也史記亦
作俾君子怠籀文辭作倅从台蓋形似之誤也
多若漢書袁盎傳諸公聞之皆多盜之多

昧昧我思之。如有一介臣。斷斷猗。無他技。其心休
休焉。其如有容。人之有技。若己有之。人之彥聖。其
心好之。不啻如自其口出。是能容之。以保我子孫
黎民。亦職有利哉。

公羊傳文十二年引作斷斷焉無他技何休注斷斷猶專一也他技奇巧異端也說文斤部詔古文斷从直直古文車引周書曰詔詔猗無他技是斷與詔古今文釋詁職主也

人之有技冒疾以惡之人之彥聖而違之俾不達是不能容以不能保我子孫黎民亦曰殆哉

邦之杌隍曰由一人邦之榮懷亦尙一人之慶

說文隍危也卽引書邦之既隍是古文杌作既也